

助

字

辨

略

助字辨略卷三目錄

上聲

孔

總

只

軋通

彼

此

爾

尔目

底

抵通

以

呂同

統

動

是

俛

俾

耳

止

已

里附

似

比

使

始

唯

幾

矣

豈

匪

猥

與

許

所

舉

甫

取

愈

愈通

每

殆

迫

乃  
延同

矧

忍

盡  
儘同

準

允

近

反

宛

本

亶  
但通

誕

但

斷

倪

鮮  
抄匙同

展

審

轉

小

少

了

好

可

果

坐

叵

頗

夥

舍

者

也

雅

假

且

往

罔

儻

黨

妄

併

請

鼎

頃

竝

並同

整

等

肯

有

否

偶

後后通

苟

某

陡

淺浸寢滯浸同

審

甚

恁

敢

漸

奄

僭

助字辨略卷三

確山劉淇武仲

孔爾雅云甚也詩國風父母孔邇書禹貢九江孔股

統後漢書胡廣傳夫紆於物則非已直於志則犯俗辭其艱則乖義徇其節則失身統之方軌易因險塗難御故昔人明慎於所受之分遲遲於歧路之間也注云統者總論上事也愚按統之猶言總之

總廣韵云合也皆也愚按統也都凡之辭也史記



五帝紀總之不離古文者近是杜元凱左傳序傳之義例總歸諸凡

動 漢書食貨志又動欲慕古不度時宜世說簡文爲相事動經年然後得過李義山詩殷憂動卽來凡云動者卽兼動輒之義乃省文也動舉動也輒卽也言每舉動卽如此也

只 說文云語已辭左傳襄公二十七年叔向謂趙孟曰諸侯歸晉之德只非歸其尸盟也杜注云只辭也又詩國風樂只君子鄭箋云又能以禮義樂其君子正義云南山有臺箋云只之言是則此只

亦爲是此箋云樂其君子猶言樂是君子矣朱傳云只語助辭愚按德只樂只竝助辭也如國風母也天只不諒人只宋玉大招純用只字乃語已辭如今思之屬又通作輒莊子大宗師而奚來爲輒崔譔云輒辭也又莊子徐無鬼請只風與日相與守河而河以爲未始其撓也杜子美詩寒花只暫香又云只想竹林眠此只字義同止猶云但也

是非之反也論語是知也孟子是尙友也又此也孟子非是之謂也漢書刑法志有君若是其賢也若是猶如此也又書蔡仲之命惟德是輔論語今

之孝者是謂能養左傳昭公七年公曰何謂六物  
對曰歲時日月星辰是謂也此是字語助不爲義  
也爾雅云時是也又云實是也詩伊可懷也鄭箋  
云伊當作繫猶是也然則時實伊是皆音相近故  
通得爲語助也又史記鄭世家子亶曰齊強而厲  
公居櫟卽不從是率諸侯伐我內厲公我不如往  
此是字謂齊指物之辭也又易繫辭是興神物以  
前民用此是字發語辭猶云爰也又顏氏家訓呂  
尙之兒如不爲上趙壹之子儻不作一便是下筆  
卽妨是書皆觸也是書之是猶凡也言凡是書札

皆觸忌諱也。今謂處處曰是處，猶云到處也。又左傳桓公六年，於是乎民和而神降之福。僖公二十五年，晉於是乎作爰田。晉於是乎作州兵。昭公元年，於是有煩手淫聲，愒堙心耳。漢書高帝紀，於是陳平夜出女子東門二千餘人。萬石君傳，奮長子建次甲次乙次慶，皆以馴行孝謹，官至二千石。於是景帝曰：石君及四子皆二千石，人臣尊寵，廼舉集其門。凡號萬石君於是者，繼事之辭。猶云爰乃也。又隱公十一年，君子謂鄭莊公於是乎有禮。襄公三年，君子謂祁奚於是能舉善矣。按傳謂鄭莊

公定許而不有此一處置爲中乎禮故云於是乎有禮祁奚三舉皆不私故云於是能舉善皆因前事而爲論定之辭或云君子謂鄭莊公於是乎有禮者言有禮僅見於此而它處不然乃寓刺之文然則祁奚可容刺耶知不然矣又左傳僖公十五年震夷伯之廟罪之也於是展氏有隱惡焉史記項羽紀廣陵人召平於是爲陳王徇廣陵未下韓退之董太傅狀又拜國子祭酒宣慰恆州於是朱滔自范陽以廻紇之師助亂人大恐此于是猶云其時尙書諸時字竝訓作是則是亦可通作時也

又孟子則是方四十里爲阱於國中駱賓王上司  
刑太常伯啓側聞魯澤祥麟希委質於宣父吳坂  
逸驥實長鳴于孫陽是則所貴在乎見知所屈伸  
乎知己則是是則其義竝同承上文爲斷辭也又  
漢書高帝紀是日車駕西都長安是日猶卽日也  
又左傳僖公十五年三施而不報是以來也孟子  
是以若彼濯濯也詩關雎序是以一國之事繫一  
人之本正義云是以者承上生下之辭言詩人作  
詩用心如此愚按是以猶云所以

彼 廣韵云對此之稱愚按俗謂此曰者箇曰者樣

謂彼曰那箇曰那樣如詩國風嘒彼小星彼茁者  
葭此彼字猶云那箇也如孟子管仲得君如彼其  
專也此彼字猶云那樣也義微有別

倮 列子倮倮成者伯成者也初非成也倮幾也將  
也相似也言將成有似于成本非成也倮與危音  
相近故得爲幾將之辭

此 是也茲也彼之對也禮記禮運如此乎禮之急  
也孟子其自任以天下之重也如此又云如此然  
後可以爲民父母漢書刑法志宣帝自在閭閻而  
知其若此又云夫以孝文之仁平勃之知猶有過

刑謬論如此甚也又指物之辭左傳莊公二十二年陳衰此其冒乎此謂敬仲也又大學此以沒世不忌也此以猶云是以所以又大學有德此有人有人此有土有土此有財有財此有用後漢書黃瓊傳自生民以來善政少而亂俗多必待堯舜之君此爲志士終無時矣諸此字猶云斯也乃也又吳志宗室傳松笑曰屬亦自忿行事有此豈有望邪有此猶言如此

俾 廣韻云使也愚按詩國風俾也可忌書大禹謨勸之以九歌俾勿壞竝是意欲其如此其義虛而



未定非使令之謂也使令之使其義實故使民奉使之使不得云俾也又省作俾荀子引詩俾民不迷作卑民不迷

爾 與余同此也是也襄陽耆舊傳自爾以來自爾猶云自此也世說謝仁祖年八歲謝豫章將送客爾時已神悟自叅上流又云許掾嘗詣簡文爾夜風恬月朗爾時是時也爾夜是夜也又吳志大帝傳注此鼠子自知不能保爾許地也爾此也許助辭爾許少辭也又世說名教中自有樂地何爲乃爾也又云正始之音正當爾耳又云君不得爲爾

此爾字猶云如此也漢書田叔傳相曰王自使人  
償之不爾是王爲惡而相爲善也吳志周魴傳不  
爾以往無以成也不爾猶云不如此也又廣韻云  
辭之必然也愚按辭之必然者語已之辭義無可  
疑如也已之類也孟子是何足與言仁義也云爾  
趙注云云爾者絕語之辭也又論語則可謂云爾  
已矣此云爾猶言如此與上義別云得爲如者詩  
國風云何吁矣之云義爲如也又論語女得人焉  
爾乎朱子語類云焉爾乎語助辭聖人之言寬緩  
而不急迫又公羊傳隱公二年前此則曷爲始乎

此託始焉爾何休云焉爾猶於是也愚按此焉爾亦語已辭若以爲於是則紀子伯莒子盟于密傳云紀子伯者何無聞焉爾此焉爾寧可作於是耶又應劭風俗通義序周秦常以歲八月遣輜軒之使求異代方言還奏藉之藏於秘室及嬴氏之亡遺脫漏棄無見之者蜀人嚴君平有千餘言林間翁孺才有梗概之法揚雄好之天下孝廉衛卒交會周章質問以次注續二十七年爾乃治正凡九千字魏志楊阜傳書曰九族既睦協和萬國事思厥宜以從中道精心計謀省息費用吳蜀以定爾

乃上安下樂九親熙熙此爾字猶云斯也然後也  
爾旣訓此故得轉爲斯也又張平子西京賦爾乃  
廣衍沃野廩田上上又云爾乃廓開九市通閭帶  
闕凡賦之更端發語多云爾乃或云爾其與上爾  
乃義別又禮記檀弓爾母從從爾爾母扈扈爾又  
云居處言語飲食衍爾漢書淮陽王傳博得謁見  
承問進問五帝三王究竟要道卓犖非世俗之所  
知諸爾字猶云然也又吳志劉繇傳一爾分離款  
意不昭世說于時江左營建始爾此爾字語助辭  
不爲義也又詩小雅爾公爾侯猶云乃公乃侯亦

助辭也又溫飛卿詩爾來何處不恬然爾來猶近來也

耳 顧氏曰知錄云而已爲耳愚按語已辭也如漢書賈誼傳逐利否耳以爲是適然耳又云主耳忘身國耳忘家公耳忘私竝與而已相近主耳忘身者言所念唯主而已不及身也又爲語餘聲與耶相近魏志崔琰傳注後與南郡習授同載見曹公出授曰父子如此何其快耳此耳字有詠歎之意與而已義別吳志劉惔傳注吳主共論鱸魚何者最美象曰鮒魚爲上吳主曰論近道耳此出海中

安可得耶象曰可得耳論近道耳之耳是而已之  
辭可得耳之耳乃語之餘聲言易得也又孟子盡  
心焉耳矣趙注云焉耳者懇至之辭孫疏云耳矣  
者言至極也愚按凡云耳矣者盡而無餘之辭如  
莊子人間世雖然止是耳矣亦同此義故趙孫訓  
爲懇至至極也

底 列子林類底春被裘注云底及也又韓退之詩  
潮州底處所又云有底怙時不肯來李義山詩柳  
映江潭底有情此底字何也那也又元微之詩那  
知下藥還沾底此底字猶云此也又通作抵溫飛

卿詩去帆不安幅作抵使西風言帆不安幅將用何物以使西風也

止 詩國風既曰歸止曷又懷止止與只同語已辭也又詩關雎序箋云今謂此序止是關雎之序庾子山華林園馬射賦止立行宮裁舒帳殿此止字僅辭也

以 古作呂廣韵云用也論語不以禮節之又云道之以政齊之以刑莊子逍遙游奚以之九萬里而南爲漢書食貨志呂臨萬貨呂調盈虛呂收奇羨又左傳僖公二十六年公以楚師伐齊取穀凡師

能左右之曰以杜注云左右謂進退在已愚按能  
左右之亦用辭也又漢書高帝紀卿者夫人兒子  
皆以君此以字猶因也以得爲因者因是爰辭爰  
用相通以旣爲用故可轉爲因也又列子宋人執  
而問其以注云以故也愚按以得爲故者亦因之  
轉也如詩國風何其處也必有以也史記惠景侯  
者表太史公讀列侯至便侯曰有以也夫有以猶  
云有因有故也又左傳昭公十三年我之不共魯  
故之以杜注云不共晉貢以魯故也愚按魯故之  
以猶云因魯之故倒文也又易繫辭夫易廣矣大



矣以言乎遠則不禦以言乎邇則靜而正以言乎  
天地之間則備矣此以字猶云于以乃爰辭也又  
詩國風其釣維何維絲伊緡鄭箋云釣者以此有  
求於彼何以爲之乎以絲之爲綸則是善釣也以  
言王姬與齊侯之于以善道相求周頌匪且有且  
匪今斯今正義云謂嘉慶禎祥之事非謂其有而  
已有之以言報應之疾也儀禮士相見禮吾子有  
辱鄭注云有又也正義云鄭轉有爲又者以言某  
子以命命某往就彼見吾子又自辱來於義爲便  
故從又不從有也愚按此以字猶云所以所以者

求其故而言之亦因之轉也又論語禮以行之適  
以出之信以成之韓退之賀冊尊號表歡欣踴躍  
以歌以舞此以字語助不爲義也又易坤卦六二  
象曰六二之動直以方也春秋隱公七年戎伐凡  
伯于楚丘以歸禮記樂記其哀心感者其聲嘶以  
殺其樂心感者其聲嘽以緩孟子自有生民以來  
史記天官書幽厲以往尚矣高帝紀南浮江漢以  
下此以字猶而也又論語無以爲也無以猶云不  
可如此爲字語助也又易復卦上六用行師終有  
大敗以其國君凶朱子本義云以猶及也愚按以

與古通與得爲及故以亦得爲及也如論語季康  
子問使民敬忠以勸猶云敬忠與勸也魏書李順  
傳此年行師當克以不猶云當克與否也韓退之  
詩凡今之人急名以官蔣之翘云韓文與多作以  
也又孟子三月無君則弔不以急乎以通已已急  
言太急也又孟子無以則王乎朱注云以已通用  
無已言必欲言之而不止也愚按此與下篇無已  
則有一焉義同緣上文旣云臣未之聞也是謀非  
吾所能及也更爲之轉作商量故云無以則王乎  
無已則有一焉也如管子臣聞之消息盈虛與百

姓紉信然後能以國寧勿已者朋其可乎亦是轉  
作商量之語非必欲言之不止也又史記趙世家  
以服爲臣王右軍帖此心以馳於彼此以字亦通  
已猶云旣已也又禮記檀弓天則不雨而望之愚  
婦人於以求之母乃已疏乎陳氏集說云於以求  
之猶言於此求之

已 漢書禮樂志自夏以往其流不可聞已師古云  
已語終辭馮唐傳唐對曰齊尙不如廉頗李牧之  
爲將也上曰何已師古云已猶耳愚按何已問辭  
也凡問之餘聲揚以長則爲何耶何與抑而短則

爲何已何耳又左傳桓公六年在己而我而已大國何  
爲而已言無餘事也又漢書叙傳敝義依霍庶幾  
云已如淳云若此人無益於治可爲庶幾而已也  
愚按云已猶而已史記太史公自序疆弱之原云  
以世徐廣云云以世一作云已也引庶幾云已爲  
證索隱云以當作已世當作也竝誤云已也皆語  
助辭愚按注以爲漢興以來諸侯廢立分削譜紀  
不明聊復紀其疆弱之原而已故云疆弱之原云  
已也此云已與叙傳義同索隱云竝誤者謂已誤  
以也誤世不知已以通用本不爲誤特也字隸文

與世相近而說耳然此句上下當有闕文又書梓材已若此史記夏紀召湯而囚之夏臺已而釋之周紀武王已乃出復軍項羽紀韓王成無軍功項王不使之國與俱至彭城廢以爲侯已又殺之倉公傳此病得之當浴流水而寒甚已則熱諸已字猶云旣也又廣韵云止也甚也詩國風無已太康毛傳云已甚也正義云已訓止也物甚則止故已爲甚也顧氏日知錄云已卽太也愚按已太過也已太重言也又禮記檀弓吾得正而斃焉斯已矣賈疏云已猶了也愚按此已字乃是止辭如史記

趙世家李兌曰諾子勉之矣吾見子已今年耳已  
今年者言止今年相見也又史記荆軻傳終已不  
顧終已竟辭猶言卒也又史記倉公傳卽嘗已爲  
人治胗病決死生有驗嘗曾也已嘗也嘗已重言  
也凡曾爲此事曰已故已得爲嘗也又世說吾時  
月不見黃叔度則鄙吝之心已復生矣又云嵇阮  
山劉在竹林酣飲王戎後往步兵曰俗物已復來  
敗人意此已字猶又也又書大誥已予惟小子孔  
傳云已發端歎辭正義云復歎而言已乎我惟小  
子也康誥已汝惟小子乃服孔傳云已乎汝惟小

子乃當服行德政。愚按已音與噫語相近，故得爲發端歎辭也。又漢書文帝紀年八十已上賜米人月一石，肉二十斤。字文通庾子山集序今之所撰止入魏已來，此已字與以通。又爾雅云已此也。郭注云方俗異語，邢疏云已此音相近，故得爲此也。又考工記里爲式，然後可以傳衆力。鄭注云里讀爲已聲之誤也。

似 廣韵云類也。象也。論語屏氣似不息者。吳志太史慈傳竝觀察子魚所以牧禦方規何似似如也。何似何如也。又世說龐士元曰論王霸之餘策覽



倚仗之要害吾似有一日之長王大將軍云阿平故當最劣庾曰似未肯劣此似字疑辭也又元微之詩子蒙將此曲吟似獨眠人吟似猶云吟向

比孟子願比死者一洗之又云且比化者無使土親膚朱注云比猶爲也又魏志東夷倭人傳對應聲曰噫比如然諾比如譬如也

使論語使驕且吝後漢書仲長統傳使居有良田廣宅使假設之辭也又史記孔子世家譬使仁者而必信安有伯夷叔齊使智者而必行安有王子比干譬使重言也

始 廣韵云初也左傳隱公五年於是初獻六羽始  
用六佾也隱公八年號公忌父始作卿士於周又  
論語始吾於人也聽其言而信其行史記高帝紀  
沛公曰始懷王遣我固以能寬容曹相國世家參  
始微時與蕭何善此始字追原之辭也與上義別  
又禮記月令桃始華蟬始鳴班固典引乃始虔摯  
勞謙兢兢業業貶成抑定不敢論制作洛陽伽藍  
記趙逸云郭璞嘗爲吾筮云壽年五百歲今始餘  
半此始字猶云方也纔也又論語賜也始可與言  
詩已矣溫飛卿詩霸才無主始憐君此始字猶云

乃也然後也又莊子齊物論有以爲未始有物者  
未始猶言未嘗

唯 論語曾子曰唯朱注云唯者應之速而無疑也

楚襄王問宋玉曰先生其有遺行與何士民衆庶  
不譽之甚也宋玉對曰唯然有之然亦應聲也旣

唯又然重應之也按禮記內則男唯女俞則唯乃  
應之急而俞乃應之徐然唯字有兩義如曾子曰

唯是答者心契其言而更無所疑惑之辭如宋玉  
曰唯則是猶未以爲然姑且答之然後徐理其說  
也史記范雎傳秦王曰先生何以幸教寡人范雎

曰唯唯若是者三此唯字竝是姑且作答與曾子之唯不同也又嚮子對文王曰唯疑注云旣唯而又疑如太史公唯唯否否之意愚按此類竝是姑應之辭非實然之也

幾 左傳僖公二十三年夫有大功而無貴仕其人能靖者與有幾杜注以其人能靖者句絕陸氏釋文以與字句絕愚按陸說爲長言有大功而不酬之以貴仕其人能安靖耶有幾人也有幾正謂其無人也荀子議兵篇是其出賃市傭而戰之幾矣楊注云此與賃市中傭作之人而使之戰相去幾

何也愚按幾矣者言相去無多也又史記循吏傳如此幾何頃乎此云幾何猶今問多少不定之辭也左傳昭公十六年子太叔子羽謂子產曰韓子亦無幾求杜注云言所求少又詩國風采芣見兮哭而弁兮未幾無多時也又吳商浩詩零落幾多紅藕花幾多猶今云許多言不少也又南唐李後主詞三十餘年家國數千里地山河幾曾慣干戈幾曾何曾也又荀子榮辱篇是其爲相縣也幾直夫芻豢之縣糟糠爾哉楊注云幾讀爲豈史記黔布傳人相我當刑而王幾是乎徐廣云幾一作豈

愚按幾是乎者疑辭也又左傳昭公十六年幾爲之笑而不陵我顧氏補正云言幾見有爲之笑而不陵我者乎與十年傳幾千人而國不亡二十四年傳幾如是而不及郢義同愚按此幾字亦當訓豈猶言豈有如此而不如此者反言之也

矣 說文云語已辭論語吾必謂之學矣是知津矣此矣字辭氣定柳子厚所謂決辭者也又論語忠矣清矣此矣字辭氣未定有僅可之意未深許之也又論語惡不仁者其爲仁矣不使不仁者加乎其身其爲仁矣猶云其爲仁也是頓挫之辭言惡

不仁者其於爲仁也不使不仁之事加乎其身不使不仁之或加是乃所以爲仁也又論語周之德其可謂至德也已矣凡語已辭詠歎深至則辭氣闡緩而長故重疊言之也又孟子天下之言性也則故而已矣而已矣者盡而無餘之辭也又孟子如以辭而已矣雲漢之詩曰周餘黎民靡有孑遺信斯言也是周無遺民也此而已矣與上義別乃反起下文辭之未畢者也又論語甚矣吾衰也史記楚元王世家甚矣安危在山令存亡在所任誠哉是言也甚矣者深歎之也

豈 廣韵云安也焉也曾也愚按又寧也孟子豈能  
獨樂哉此豈字安也焉也寧也金重於羽者豈謂  
一鈎金與一輿羽之謂哉此豈字曾也寧也詩國  
風豈不夙夜謂行多露此豈字寧也非也又何也  
論語且而與其從辟人之士也豈若從辟世之士  
哉漢書賈誼傳豈如今定經制令君君臣臣上下  
有差父子六親各得其宜豈若豈如猶云何若何  
如漢書王貢兩龔傳各口鄭子真不詘其志耕於  
巖石之下名震於京師豈其卿豈其卿豈其卿者  
猶云何必卿也又後漢書爰延傳夫以光武之聖



德嚴光之高賢君臣合道尚降此變豈況陛下今  
所親幸以賤爲貴以卑爲尊哉吳志諸葛恪傳自  
孔氏門徒大數三千其見異者七十二人至於子  
張子路子貢等七十之徒亞聖之德然猶各有所  
短師辟由嘯賜不受命豈況下此而無所闕豈況  
何況也又論語其然豈其然乎史記項羽紀羽豈  
其苗裔邪漢書卜式傳家豈有冤欲言事乎此豈  
字辭之未定與寧義通又史記封禪書此豈所謂  
無其德而用事者邪吳王濞傳母爲權首反受其  
咎豈益錯耶漢書西南夷兩粵朝鮮傳追觀太宗

填撫尉佗豈古所謂招撫以禮懷遠以德者哉此豈字亦辭之未定猶云殆也又後漢書隗囂傳若囂命會符運敵非天力雖坐論西伯豈多嗤乎注云多厚也言未可厚以爲非笑也愚按此豈字猶云豈可省文也又吳語春秋貢獻不解於王府大王豈辱裁之此豈字與其通音相近也

匪 廣韵云非也易屯卦六二匪寇婚媾又不也詩國風夙夜匪懈後漢書順帝紀間者日食毀缺陽光晦暗朕祇懼潛思匪遑啓處又左傳襄公八年引詩如匪行邁謀是用不得於道杜注云匪彼也

顧氏補正云詩箋云不行而坐圖遠近故不得於道路也此解曰匪彼也行邁謀謀於路人也不得於道衆無適從按詩上文云謀夫孔多是用不集發言盈庭誰敢執其咎則此解爲長古人有以匪字作彼字用者二十七年引詩彼交匪敖作匪交匪敖愚按謀夫雖多而無老成人譬如行邁而不與行邁者謀終不得其道耳此匪字當仍訓非然補正說亦通兩存之以備考又宇文適庾子山集序年十五侍梁東宮講讀雖桓麟十四之歲客宿客之詩魯連十二之年杜離堅之辨匪或斯尙同

日語哉此匪字猶豈也或語助尙庶幾也言桓麟魯連未可與此同日而語也

猥 漢書律歷志壽王猥曰安得五家歷王尊傳猥歷奏大臣師古竝云猥曲也劉歆傳猥以不誦絕之師古云猥苟也苟不誦習之而欲絕去此學曹子建上責躬詩表不圖聖詔猥垂齒召李善云猥猶曲也殷仲文詩猥首阿衡朝五臣云言已以凡猥矣首朝端也許慎淮南子注猥猶凡也正字通云猥鄙也凡自稱猥者卑辭也愚按猥猶云謬也與 論語夫子之言性與天道不可得而聞也正義

云與及也史記周紀昔自夏后之衰也有二神龍  
止於夏帝庭而言曰余褒之二君夏帝卜殺之與  
去之與止之莫吉漢書刑法志凡有爵者與七十  
者與未齒者皆不爲奴諸與字竝及也若也又漢  
書高帝紀今某之所就孰與仲多師古云與亦如  
也匈奴傳單于自度戰不能與漢兵師古云與猶  
如也東方朔傳上復問朔方今公孫丞相兒大夫  
董仲舒夏侯始昌司馬相如吾丘壽王主父偃朱  
買臣嚴助汲黯膠倉終軍嚴安徐樂司馬遷之倫  
皆辨知閎達溢於文辭先生自視何與比哉師古

云何與猶言何如也張平子西京賦此何與於股  
人屢遷前八而後五李善云廣雅云與如也言欲  
遷都洛陽何如殷之屢遷乎又論語禮與其奢也  
寧儉左傳閔公元年爲吳太伯不亦可乎猶有令  
名與其及也與其反設之辭傳先云猶有令名後  
云與其及也者倒文也又孟子與我處畎畝之中  
由是以樂堯舜之道吾豈若使是君爲堯舜之君  
哉史記魯仲連傳吾與富貴而調於人寧貧賤而  
輕世肆志焉此與字卽與其省文也漢書藝文志  
漢興魯申公爲詩訓詁而齊轅固燕韓生皆爲之

傳或取春秋采雜說咸非其本義與不得已魯最爲近之師古云與不得已者言皆不得已也三家皆不得其真而魯最近之愚按此云三家皆非本義與其皆不得毋寧魯也又漢書賈誼傳陛下雖賢誰與領此此與字猶共也又杜元凱左傳序又別集諸例及地名譜第歷數相與爲部凡四十部十五卷相與者比合之辭也

許 古樂府奈何許石闕生口中銜碑不得語世說直以真率少許便足對人多多許許者語之餘聲不爲義也如李太白詩奈何成離居相去復幾許

杜子美詩我生本飄蓬今復在何許似乎幾許爲  
幾何何許爲何所然相去復幾便是幾何今復在  
何便是何所幾何何所之義不因許字而見特借  
許字爲助句耳如問何許人則何許又爲何等不  
爲何所矣他若爾許之爲此如許之爲如此許字  
在此竝是助辭不爲義也或問爾許之許爲助句  
是也如許之許亦作助句寧如字可訓爲如此邪  
曰如此猶云箇樣今人語緩則云箇樣語急則竟  
云箇矣然則如許之如亦語之急者也

所處所也借爲語助然凡云所皆有所在雖不爲



義要自與而以之屬別如論語視其所以觀其所  
由察其所安所以所由所安皆有方向故云所也  
大學其所厚者薄而其所薄者厚所厚所薄皆據  
其人而言也中庸舟車所至人力所通天之所覆  
地之所載此爲所至所通所覆載之處而言也又  
中庸所求乎子以事父未能也所求乎臣以事君  
未能也此以求子求臣之道事君父有一定之則  
故云所也又詩小雅所謂伊人於焉嘉客此指意  
中欲留之人故云所謂大學所謂修身在正其心  
者此所謂引前文也詳四卷謂字條下凡此所字

皆有所指目非空爲助句者也又論語予所否者  
天厭之天厭之注疏云所誓辭也左傳僖公二十  
四年所不與舅氏同心者有如白水文公十三年  
所不歸爾帑者有如河宣公十七年所不此報無  
能涉河襄公二十三年所不請於君焚丹書者有  
如日二十五年嬰所不唯忠於君利社稷者是與  
有如上帝昭公三十一年所能見夫人者有如河  
定公三年余所有濟漢而南者有若大川六年所  
不以爲中軍司馬者有如先君哀公十四年所不  
殺子者有如陳宗杜注竝云所誓辭也愚按所字

未必便是誓辭疑當時誓辭之例以所字爲發句而繼之以有如云何也又孟子所以不願人之膏粱之味也所以不願人之文繡也所以猶云故也又漢書于定國傳曰夜思惟所以未能盡明思惟所以猶云思惟其故與上所以義別又孟子其所以放其良心者亦猶斧斤之於木也又云拱把之桐梓人苟欲生之皆知所以養之者漢書張安世傳賀內傷太子無辜而曾孫孤幼所以視養拊循恩甚密焉所以放其良心者原其放之之心皆知所以養之者原其養之之術所以視養拊循者原

其視養之密非可悉舉其事故統云所以也又漢書賈誼傳此所以爲主上豫遠不敬也所以體貌大臣而厲其節也此言廉遠地則堂高故刑戮不加於大臣乃爲主上豫遠不敬而厲大臣忠節之道也又云夫嘗已在貴寵之位天子改容而體貌之矣吏民嘗俯伏以敬畏之矣今而有過帝令廢之可也退之可也賜之死可也滅之可也若夫束縛之係縲之輸之司寇編之徒官司寇小吏詈罵而榜笞之殆非所以令衆庶見也夫卑賤者習知尊貴者之一旦吾亦廼可以加此也非所以習天

下也此言衆庶可以辱大臣其流將滯以及上非  
習教衆庶豫遠不敬之道也皆探本言之故云所  
以又誼策云諸侯之地其削頗入漢者爲徙其侯  
國及封其子孫也所以數償之此言諸侯之地已  
削而入於漢其後又以之封它侯國不可奪見在  
者還舊封之諸侯別以它地如其祖所封之數而  
償之也此所以猶云其以又禮記檀弓其高可隱  
也鄭注云隱據也封可手據謂高四尺所疏云言  
墳之高可四尺之所以人長八尺低而據之半爲  
四尺且約上墳崇四尺故云四尺所所是不定之

辭愚按四尺所猶云四尺許未定是四尺強弱故  
云所也如漢書疏廣傳數問其家金餘尙有幾所  
師古云幾所猶言幾許又如史記晉侯世家父去  
里所復還吳志周魴傳才晉三千所兵守武昌耳  
世說自後賓客絕百所日諸所字竝許辭也又漢  
書佞幸傳上有酒所師古云言酒在體中師古訓  
所爲處所故云酒在體中恐非此言被酒而已未  
至沉醉故云有酒所此所字亦是語助不爲義也  
舉 孟子舉欣欣然有喜色注云舉皆也漢書曹參  
傳參代何爲相國舉事無所變更師古云舉皆也

言凡事皆無變改愚按此舉字徑訓凡於義爲協  
又顏氏家訓舉家無食汝何處來舉家猶云全家  
甫 廣韵云始也愚按始也方也纔也漢書元許后  
傳今吏甫受詔讀記師古云甫始也宋書謝靈運  
傳至於建安曹氏基命三祖陳王咸育盛藻甫乃  
以情緯物以文被質甫乃方乃也蜀志秦宓傳甫  
欲鑿石索玉剖蚌求珠今乃隋和炳然有如皎日  
甫欲者方欲如何而猶未如何也

取 孟子楊子取爲我朱注云取者僅足之意言僅  
足於爲我而已不及爲人也漢書佞幸傳二人之

寵取過庸不篤師古云纔過於常人耳不能大厚也愚按纔亦僅也又岑嘉州詩別君能幾日看取髭成絲白香山詩聽取新翻楊柳枝此取字語助也

愈益也又與俞通荀子榮辱篇清之而俞濁者口也參之而俞瘠者交也楊注云俞讀爲愈又史記秦本紀遂復三人官秩如故愈益厚之愈益重言也又後漢書班固傳彪固譏還以爲是非頗謬於聖人然其議論常排死節否正直而不叙殺身成仁之爲美則輕仁義賤守節愈矣注云愈猶甚也



愚按愈矣者省文言愈甚也又左太冲三都賦孰  
愈尋靡泝於中遠造沐猴於棘刺孰愈猶云何異  
言相去無幾也

每爾雅云每有雖也郭注云詩曰每有良朋辭之  
雖也邢疏云小雅常棣云每有良朋況也永歎毛  
傳云況茲永長也箋云每有雖也良善也當急難  
之時雖有善同門來茲對之長歎而已郭云辭之  
雖也者言爲語辭之雖無他義也又孟子故爲政  
者每人而悅之日亦不足矣每人猶云人人漢書  
元許后傳妾伏自念入椒房以來遺賜外家未嘗

踰故事每輒決上可覆問也師古云每事皆奏決於天子乃敢行也愚按每事猶凡事但云每者省文也又吳志陸抗傳諸將咸欲攻鬪抗每不許魏文帝與吳質書每一念至何時可忘此每字猶常也其事非一故云每也魏志夏侯平傳注豐爲中書二歲帝比每獨召與語不知所說比類也比每猶云常常重言也

殆 詩國風殆及公子同歸毛傳云殆始也孔疏云釋詁云殆始也說者皆以爲生之始然則殆始義同故爲始也愚按殆助辭猶云將也乃也如易繫

辭顏氏之子其殆庶幾乎孟子殆於不可殆不可  
復史記張儀傳蘇秦已而告其人曰張儀天下賢  
士吾殆弗如也扁鵲傳乃悉取其禁方書盡與扁  
鵲忽然不見殆非人也後漢書楊賜傳故春秋兩  
蛇鬪於南門昭公殆以女敗康王一朝晏起關雎  
見幾而作諸殆字竝是助辭不爲義也又禮記檀  
弓不殆於用人乎哉正義云殆近也愚按殆幾也  
幾有將及之義故云近也魏志王朗傳注登與縣  
長王儁帥吏兵七十二人直往赴救與賊交戰吏  
兵散走儁始見害登手格一賊以全儁命此殆字

垂及之辭也。又木經：梓昭冢有石闕，闕前有二碑，碑字淪碎，不可復識。牟虎傾低，殆存而已。此殆字猶云僅也。又荀子：強國篇，若是則雖爲之築明堂於塞外，而朝諸侯，使殆可矣。楊注云：殆，庶幾也。愚按：僅將垂庶皆是，與辭展轉相訓，其義有別。

迨 爾雅云：及也。詩：國風，迨天之未陰雨。

乃 古作廼。鄭樵云：引辭也不絕之義也。詩：大雅，廼召司空，廼召司徒。史記：主父偃傳，以爲諸侯莫足游者，乃西入關，見衛將軍，乃者繼事之辭。猶云爰也。又書：仲虺之誥，乃葛伯仇餉，此乃字猶云乃者。

如史記歷書乃者有司言星度之未定也曹相國  
世家乃者我使諫君也竝是發語之辭又孟子乃  
若其情則可以爲善矣蜀志秦宓傳乃自先漢以  
來其爵位者或不如餘州耳至於著作爲世師式  
不負於餘州耳此乃字亦是發語辭猶云粵也乃  
若猶粵若也又書大禹謨乃聖乃神乃文乃武盤  
庚其乃貝玉此乃字語助辭不爲義也禮記雜記  
祝稱卜葬虞子孫曰哀夫曰乃鄭注云夫曰乃某  
卜葬其妻某氏孔疏云乃者言之助也妻卑故假  
助句以明夫之尊也又書盤庚萬民乃不生生暨

予一人猷同心此乃字亦是語助然與上義別凡  
非意所及用相違戾則語助云乃也又書盤庚乃  
祖乃父舊訓乃爲汝按此亦當是語助如後漢書  
袁紹傳加自乃祖先臣以來世作輔弼任助爲范  
尚書讓吏部封侯表乃祖乎平道風秀世竝自稱  
其先祖爲乃祖不訓作汝也又易萃卦初六有孚  
不終乃亂乃萃此言不終其孚則自亂其所萃上  
乃字繼事之辭下乃字猶云其也又漢書賈誼傳  
古之王者太子廼生師古云廼始也又後漢書班  
固傳伊考自邃古乃降注云言自遠古以來又周

禮小司寇正歲帥其屬而觀形象令以木鐸曰不用灋者國有常刑令羣士乃宣布于四方憲刑禁乃命其屬入會乃致事疏云謂命已下屬官使入會計文狀來乃致事于王故云乃乃緩辭禮記雜記公視大歛公升商祝鋪席乃歛陳氏集說云乃始鋪席爲歛事愚按此乃字猶云然後亦繼事之辭也又莊子逍遙游而後乃今培風而後乃今將圖南韓非說難大中無所拂辭悟言無所擊排乃後申其辨知焉此所以親近不疑漢書叙傳囂問彪曰往者周以戰國竝爭天下分裂數世然後乃

定吳志張紘傳自古帝王受命之君雖有皇靈佐於上文德播於下亦賴武功以昭其勲然而貴於時動乃後爲威耳而後乃然後竝重言也又莊子大宗師孟孫氏特覺人哭亦哭是自其所以乃且也注云乃如此也愚按自從也言孟孫以爲人哭而亦哭是從乎世情所不得不然聊且與之哭也舊讀乃字句絕而以且也屬下句恐非又德充符子無乃稱此乃字亦合訓如此言無爲如此稱說也又史記東越傳且秦舉咸陽而棄之何乃越也何乃猶云何但又公羊春秋宣公八年已



丑葬我小君頃熊雨不克葬庚寅日中而克葬傳  
云而者何難也乃者何難也曷爲或言而或言乃  
乃難乎而也按乃非難辭以其有然後之義故云  
難于而也凡事先已不如此而後始如此者乃云  
然後故可訓爲難也又史記大宛傳蓋乃北海云  
昭明太子文選序蓋乃事美一時語流千載魏志  
東夷傳注此蓋乃昔所謂西戎在於街冀源道者  
也蓋乃發語辭也又庾子山枯樹賦若乃山河阻  
絕飄零離別若乃更端語也又後漢書朱穆傳至  
乃田竇衛霍之游客廉頗翟公之門賓進由執令

退山袞異至乃猶云至于

矧爾雅云況也注云譬況詩大雅矧可射思

忍說文云能也徐氏云能音耐杜子美詩可忍醒  
時雨打稀可忍猶俗云爭耐也又杜詩忍使驂驪  
氣凋喪此忍字猶云不忍省文也

盡皆也悉也左傳昭公元年周禮盡在魯矣定公  
八年虎曰盡客氣也又漢書諸侯王表自鴈門以  
東盡遼陽爲燕代律歷志詔與丞相御史大將軍  
右將軍史各一人雜候上林清臺課諸歷疏密凡  
十一家以元鳳三年十一月朔旦冬至盡五年十

二月各有第此盡字猶云訖也又廣韵云卽忍切  
按曲禮虛坐盡後食坐盡前此盡字當讀如卽忍  
切今作儘也儘前儘後者言極至於前極至於後  
不容餘地今俗云儘讓是也又增韵云縱令也柳  
永卜算子詞儘無言誰會高意周密探春詞儘教  
寬盡春衫此儘字猶任也今云任其如何曰儘如  
何也

準 猶定也劉德仁詩曾緣玉貌君王寵準擬人看  
似舊時

允 廣韵云信也愚按信也誠也審也左傳信公二

十八年軍志曰允當則歸史記司馬相如傳允哉  
漢德後漢書文苑傳允所謂遭仁遇神真所宜傳  
而著之

近 廣韻云幾也愚按將及之辭也後漢書方術傳  
適見其歸此而已近五百歲矣世說王大爲吏部  
郎嘗作選草臨當奏主僧彌來聊出示之僧彌得  
便以已意改易所選者近半又詩大雅往近王舅  
南土是保說文云按古文讀近爲旣朱傳云近語  
辭也愚按朱說爲長往近王舅猶言汝往哉王舅  
也又公羊傳撥亂世反諸正莫近於春秋何休云

莫近猶莫過之也。又魏志華佗傳後太祖親理得病篤重使佗專視佗曰此近難濟恆事攻治可延歲月蜀志宗預傳注臣松之以爲芝以年啁預是不自顧然預之此答觸人所忌載之紀牒近爲煩文晉書謝萬傳主義之與桓溫牋曰謝萬才流經通處廊廟叅諷議故是後來一器而今屈其邁往之氣以撫順荒餘近是違才易務矣此近字猶殆也近得爲獎故亦得爲殆也

反 廣韵云不順也史記封禪書及到三神山反居水下漢書賈誼傳足反居上又漢書董仲舒傳春

秋深探其本而反自貴者始此反字猶云還也

宛 廣韵云宛然也愚按宛然者如辭也詩國風宛  
在水中央言宛然如在也又如國風宛其死矣此  
宛字亦是如辭然是假如之義與宛如不同朱傳  
訓爲坐見恐非

本 原始之辭也史記齊悼惠王世家灌嬰在滎陽  
聞魏勃木敎齊王反晉侯世家竟不易太子者晉  
侯本招此四人之力也

亶 廣韵云信也詩小雅亶其然乎言信然也又通  
作但漢書賈誼傳非亶倒縣而已揚雄傳亶費精

神於此

誕 詩大雅誕彌厥月又云誕寘之隘巷朱傳竝云

誕發語辭

但 漢書食貨志民欲祭祀喪紀而無用者錢府以

所入工商之貢但賒之師古云但空也徒也言但

賒與之不取息也淮陽王傳縱不伏誅必蒙遷削

貶黜之罪未有但已者也師古云但徒也愚按但

已者言徒然如此而已不復有所短長也又漢書

蕭望之傳後上召堪更生曰繫獄上大驚曰非但

廷尉問邪此但字猶僅也又魏志鍾會傳但可勅

會取艾不足自往但可猶云只須李太白詩但使  
主人能醉客不知何處是他鄉此但字與上義頗  
相近言只要得主人肯醉客耳又何恤他鄉邪又  
李陵答蘇武書但聞悲風蕭條之聲此但字猶云  
唯獨也魏志劉廙傳非但君當知臣臣亦當知君  
非但猶云非唯非獨又魏志太祖紀注初不中風  
但失愛於叔父故見岡耳吳質傳公幹有逸氣但  
未道耳此但字是轉語猶云第也特也又王右軍  
帖但言此心以馳於彼矣此但字猶云凡也今云  
但凡如何也



斷 決辭易繫辭介如石焉寧川終日斷可識矣李  
義山詩斷無消息石榴紅

倪 詩大雅倪天之妹毛傳云倪磬也孔疏云磬作  
是天之妹又云此倪字韓詩文作磬則倪磬義同  
也說文云倪喻也詩云倪天之妹謂之譬喻卽引  
此詩箋云尊之如天之有女弟與譬喻之言合蓋  
如今俗語譬喻物云磬作然也愚按倪非譬喻當  
是宛如之義故以譬喻釋之也倪五兩也又謂之  
統所以相風者也恐是統宛音近遂以倪作統而  
以統通宛也

鮮爾雅云希寡鮮罕也郭注云罕亦希也廣韵云少也論語巧言令色鮮矣仁左傳僖公二十年以欲從人則可以人從欲鮮濟又詩大雅鮮不爲則鮮不少有不也又與尠尠同魏志明帝紀注夫君有天下而不得萬姓之歡心者尠不危殆

展廣韵云審也愚按審也信也允也誠也詩國風展我甥兮

審離騷審吾法夫前修兮王逸云審辭也愚按發語辭也

轉猶滯也王右軍帖但恐前路轉欲逼耳宋書王

景文傳吾踰忝轉深足以致謗水經注劉靖碑云  
詔書以民食轉廣陸費不贍轉得爲滯者言其展  
轉非向境也

小 少也略也世說上意欲令小加弘潤又云目小  
欲晚

少 略也漢書賈誼傳此人少壯豈能忌其父哉少  
壯猶言稍長又云願陛下少畱計言少少畱意也  
又孟子少則洋洋焉莊子少焉徐無鬼曰嘗語君  
少則少焉猶云少頃也

了 絕也殊也世說庾子嵩讀莊子開卷一尺許

放去曰了不異人意又歐陽永叔青玉案詞一年  
春事都來幾早過了三之二過了猶云過卻方言  
助語也

好 猶善也珍重付屬之辭世說汝若爲選官當好  
料理此人李義山詩好爲麻姑到東海勸栽黃竹  
莫栽桑

可 否之反也中庸天下國家可均也魯祿可辭也  
白刃可蹈也中庸不可能也又云夫婦之愚可以  
與知焉夫婦之不肖可以能行焉可卽可以以爲  
語助也又大學有國者不可以不慎不可不勉辭

也又左傳隱公三年光昭先君之令德可不務乎可不猶云豈可不省文也又廣韵云許可也愚按許可之可有兩義如孟子事親若曾子者可也此深許之辭論語替月而已可也此僅可之辭又范曄後漢書自叙班氏最有高名旣任情無例唯志可推耳博瞻可不及之整理未必愧也又云欲徧作諸志前漢可有者悉令備可不及之猶云當不及之可有猶云當有漢書如禮儀典服等志皆缺此皆史所宜備故云前漢可有者也蔡邕陳政事七要先帝舊典未嘗有此可皆斷絕以覈真僞魏

志鍾會傳但可勅會取艾不足自往邲原傳注軍  
中士大夫詣原者數百人太祖怪而問之時荀文  
若在坐對曰獨可省問邲原耳諸可字皆當辭也  
當有應合之義亦否之反也又史記高帝紀遇剛  
武侯奪其軍可四千餘人漢書天文志五殘星其  
狀類辰去地可六丈此可字約計之辭也又書堯  
典試可乃已史記作試不可用而已可云不可者  
省文也如五子之歌雖悔可追言雖悔不可追亦  
省文也又李義山詩可要昭陵石馬來又云此情  
可待成追憶又云可在青鸚鵡方雄飛詩棲身可

在深此可字何辭也可要猶云何用可在猶云何  
必又黃機酹江月詞黃昏可更子規聲碎烟塢賀  
鑄清平樂詞楚城滿日春華可堪游子思家此可  
字猶云那也可得爲何故亦得爲那也又盧祖皋  
賀新涼詞可是功名從來誤可是疑辭也又通作  
得詩小雅芻矣富人

果 信也審也史記商本紀是時說爲胥靡築於傅  
險見於武丁武丁曰是也得而與之語果聖人漢  
書趙后傳宮讀書已曰果也世說有識者果不異  
人意韓退之樊宗師墓誌嘗與觀樂曰後當然已

而果然又孟子君是以不果來也趙注云果能也  
按廣韵云果定也與此義協凡言與事應曰果既  
許其來而不來是不能遽定其來故云不果仍是  
信審之辭非不能之謂也又晉語果喪其田注云  
果猶竟也愚按果是竟事之辭故得爲竟也

坐 漢書景帝紀它物若買故賤賣故貴皆坐臧爲  
盜按漢法入罪曰坐言罪與律應不得移動也賈  
誼傳古者大臣有坐不廉而廢者此坐字與上義  
少別猶今云緣某事落職也又漢書李陵傳坐預  
詔之得令老將生姦詐後漢書光武紀邑曰吾昔



以虎牙將軍圍翟義坐不生得以見責讓漢詩但坐觀羅敷此坐字猶云因也又蔡邕幽冀刺史久闕疏以陛下威靈申明禁令在任之人豈不戒懼而當坐設三五自生晉陽邪此坐字猶云定也坐是不動之義故得爲定也又韋應物詩無將一會易歲月坐推遷坐猶云坐見可待之辭言歲月推遷將坐而見之也

叵 廣韵云不可也後漢書呂布傳布目備曰大耳兒最叵信叵云不可者語之急兩字連作一聲也又後漢書隗囂傳帝知其終不爲用叵欲討之班

趙傳趙欲因此叵平諸國注竝云叵遂也又謝靈運詩懷故叵新歡此叵字猶云無也因不可之義轉相通借耳

頗 略也少也史記三代世表自殷以前諸侯不可得而譜周以來乃頗可著叔孫通傳臣願頗采古禮與秦儀雜就之漢書高帝紀頗取山南太原之地益屬代師古云少割以益之不盡取也又漢書王莽傳今阨會已度府帑雖未能充略頗稍給略卽頗也頗卽稍也此以三字爲重言者也又史記漢興以來諸侯年表漢獨有三河東郡潁川南陽

自江陵以西至蜀北自雲中至隴西與內史十五  
郡而公主列侯頗食邑其中師古漢書注云十五  
郡中又往往有公主列侯之邑也愚按公主列侯  
食邑不盡在十五郡中乃時有之故云頗也漢書  
車千秋傳至今餘巫頗脫不止師古云言往往尙  
爲蠱也愚按脫或辭頗脫不止者言時或有爲之  
者不休止也此二條亦是稍略之辭而義有不同  
又史記三代世表孔子因史文次春秋紀元年正  
時日月蓋其詳哉至於序尙書則略無年月或頗  
有然多闕此與上諸頗字亦相近或頗有者猶云

間或有之也又漢書陳湯傳騎引卻頗遣吏士射城門騎步兵此頗字猶云遂也後漢書隗囂班超傳竝訓叵爲遂叵頗同音則頗亦得爲遂也又漢書田寶傳於是上使御史簿責嬰所言灌夫頗不讐効繫都司空此頗字猶云皆也頗不讐者言嬰爲夫白寃皆不實也若略不實不應遂因繫嬰矣如趙充國傳將軍獨不計虜聞兵頗罷且丁壯相聚攻擾田者及道上屯兵復殺略人民將何以止之李廣傳李蔡以丞相坐詔賜冢地陽陵當得二十畝蔡盜取三頃頗賣得四十餘萬此頗字竝是

盡悉之辭頗本訓略而略又有盡悉之義故轉相通也盡悉則是遂事之辭故頗叵又得爲遂也又漢書賈誼傳割地定制合齊趙楚各爲若干國使悼惠王幽王元王之子孫畢以次各受祖之分地地盡而止及燕梁它國皆然其分地衆而子孫少者建以爲國空而置之須其子孫生者舉使君之諸侯之地其削頗入漢者爲徙其侯國及封其子孫也所以數償之一寸之地一人之衆天子無所利焉誠以定治而已師古云徙其侯國列侯國邑在諸侯王封內而犬牙相入者則正其疆界令其

隔絕也封其子孫者分諸侯王之國邑各自封其子孫而受封之人若有罪黜其地皆入於漢故云頗也愚按其削頗入漢之頗乃旣已之辭不得訓爲皆也此緣上文各受祖之分地而言言諸王之地見在而未削入漢者令其子孫分受之其分地衆子孫少者則建而空置之以待更生之子孫受之其業已見削入漢漢又已徙它侯國及封它子孫於其地矣不可奪見在所封者還之乃別以它地如其祖所封之數而償之此二條者割地定制之大端故云一寸之地一人之衆天子無所利也

如師古云乃複舉上文耳且有罪黜仍削入之安見寸地一人非所利邪恐不然矣又後漢書五行志引風俗通云龍從兄陽求臘錢龍假取繁數頗厭患之又云丞相邴吉以爲道路死傷既往之事京兆長安職所窮遂而任車問牛喘吐舌者豈輕人而貴畜哉頗念陰陽不和必有所害此頗字猶云甚也

夥 史記注云楚謂多爲夥說文云齊謂多曰夥愚按夥驚歎聲也義詳一卷頤字條下

舍 論語君子疾夫舍曰欲之而必爲之辭舍曰猶

云不曰舍是不取之義故可通爲不也又孟子且  
許子何不爲陶冶舍皆取諸其宮中而用之趙注  
云舍止也愚按止猶只也舍是止息之義借作止  
辭也此舍字當讀作去聲

者 說文云別事辭也正字通云凡文有者字所以  
爲分別隔異也愚按如中庸仁者人也義者宜也  
是也又增韵云卽物之辭愚按如論語事其大夫  
之賢者友其士之仁者是也又論語君曰告夫三  
子者左傳隱公五年公將如棠觀魚者此者字語  
已辭也又唐人疏狀凡引經旨訖則以者字足之



如韓退之論變鹽法事宜狀有奉勅將變鹽法事  
貴精詳宜令臣等各陳利害可否聞奏者陸宣公  
收河中後請罷兵狀昨日欽淑奉宣聖旨示臣馬  
燧渾瑊等奏平懷光收河東狀兼令臣商量須作  
何處置令欽淑奏來者此者字亦語已之辭當時  
體例如此也宋人亦多用此式又公羊傳宣公二  
年勇士入其大門則無人門焉者入其闔則無人  
闔焉者焉者亦語已辭也又論語安見方六七十  
如五六十而非邦也者禮記檀弓魯人有周豐也  
者也者語已辭又論語孝弟也者此是語之頓挫

與上也者義別又公羊傳隱公二年然則爲取可  
以爲其有乎曰否何者若楚王之妻媼無時焉可  
也何休云何者將設事類之辭又蜀主王衍醉妝  
詞者邊走那邊走者邊猶云此邊也毛晃云凡稱  
此箇爲者箇俗多改用這字這乃迎也愚按這音  
彥今借作者讀作者去聲韋穀才調集載無名氏  
詩云三十六峯猶不見況伊如燕這身材唐人用  
這字始此

也 廣韵云語助辭之終也愚按詩國風何其處也  
必有以也此也字在句末辭之終也其後也悔其

嘯也歌此也字在句中但爲助句而已又論語曰也賜也此語助用之稱謂者也又論語赤之適齊也吾聞之也此也字語之頓挫與語已辭別又孟子我非愛其財而易之以羊也宜乎百姓之謂我愛也我非愛其財句絕而易之以羊也猶云而易之以羊矣言我非愛財而後以小易大然旣已以小易大矣宜乎百姓之謂我愛財也論語其爲仁矣猶云其爲仁也矣得爲也則也亦得爲矣竝辭之頓挫者也又孟子未有仁而遺其親者也未有義而後其君者也語輕但爲也語重則爲者也亦

語已辭也。又韓非說難所說出於爲名高者也。而說之以厚利則見下節而遇卑賤必棄遠矣。所說出於厚利者也。而說之以名高則見無心而遠事情必不收矣。此者也。乃辭之頓挫與上者也。義別又杜子美詩青袍也自公此也字猶亦也。

雅 史記高帝紀雍齒雅不欲屬沛公服虔云雅故也。蘇林云雅素也。又漢書燕王劉澤傳今呂氏雅故本推轂高帝就天下按雅是推原平素之辭故服訓故也。旣云雅又云故重言也。又世說劉尹先推謝鎮西謝後雅重劉此雅字猶云極也。

假 廣韵云且也借也愚按假是設辭且復譬况故

云且也借也荀子性惡篇假之有弟兄資財而分者水經注俗說以唐城爲望都城者自北無城以擬之假復有之途程紆遠山河之狀全乖古證又莊子大宗師浸假而化予之左臂以爲雞予因以求時夜浸假而化予之右臂以爲彈予因以求鴉炙浸假而化予之尻以爲輪以神爲馬予因而乘之豈更駕哉郭象云浸漸也愚按浸假而化者言假如漸化倒文也此假字亦是設辭郭云漸者止以訓浸非訓假也今遂以浸假爲漸者非又莊子

德充符奚假魯國丘將引天下而與從之郭注訓  
奚假爲何但愚按但第也第且也假旣爲且故亦  
得爲但也又荀子非十二子篇假今之世飾邪說  
文姦言以梟亂天下欺惑愚衆苟字鬼瑣使天下  
混然不知是非治亂之所存者有人矣此假字猶  
云如也若也如若有假設之義故轉相通也又詩  
周頌假以溢我我其收之朱傳云假何之轉也愚  
按詩遐假通何遐通故假得轉爲何也

且 孟子且以文王之德且以猶云夫以賈誼過秦  
論且夫天下非小弱也二且字發語辭也又論語

且爾言過矣。又云：且爾與其從辟人之士也，豈若從辟世之士乎哉？戰國策宣王曰：嗟乎！君子焉可侮哉？寡人自取病耳。及今聞君子之言，乃今聞細人之行，願請受爲弟子。且顏先生與寡人游，食必太牢，出必乘車，妻子衣服都麗。諸且字是轉語，猶云抑也。又詩國風：且以喜樂，且以永日。史記秦本紀：臣誠私利祿爵，且畱再用其言，得脫一不用及虞君難。漢書馮奉世傳：丞相御史兩將軍皆以爲民方收歛時，未可多發萬人屯守之。且足後漢書馮魴傳：褒等聞帝至，皆自髣剔，負鈇鑕，將其衆。

罪帝且赦之諸且字竝是聊且姑且之辭又孟子  
人且惡之又云然且至又云管仲且猶不可召後  
漢書孔融傳雖無老成人且有典型諸且字猶云  
尚也且猶卽猶尚重言也又史記秦本紀賓客羣  
臣有能出奇計彊秦者吾且尊官與之分土項羽  
本紀范增謂項莊曰若入前爲壽請以劍舞擊沛  
公於坐殺之不者若屬皆且爲所虜漢書杜欽傳  
欽子及昆弟支屬至二千石者且十人諸且字猶  
云將也又戰國策秦伐魏取安邑伐趙取晉陽伐  
楚取鄢郢矣覆三國之軍兼二周之地舉韓氏取



其地且天下之半注云且猶幾也愚按猶幾將也  
又莊子方且本身而異形方且尊知而大馳陸德  
明音義云凡言方且者言方將有所爲也又荀子  
性惡篇假之有弟兄資財而分者且順情性好利  
而欲得若是則兄弟相拂奪矣且化禮義之文理  
若是則讓乎國人矣楊注云且發辭也愚按此二  
且字亦是將辭乃語之助不爲義者也語助在句  
首故楊云發辭也周語叔父實應且憎以非余一  
人莊子齊物論夫隨其成心而師之誰獨且無師  
乎此二且字語助在句中者亦將辭也又後漢書

文苑傳且公且侯子子孫孫且公且侯猶云乃公  
乃侯亦發語辭也又詩周頌匪且有且匪今斯今  
振古如茲毛傳云且此也鄭箋云饗燕祭祀心非  
云且而有且謂將有嘉慶禎祥先來見也心非云  
今而有此今謂嘉慶之事不問而至也言修德行  
禮莫不獲報乃古古而如此所由來久非適今時  
孔疏云有天下者主于敬待神人接之以禮則人  
神慶悅至誠感物祥瑞必臻故知非且有且非今  
斯今謂嘉慶禎祥之事非謂其有而已有之以言  
報應之疾也且實語助但今謂今時則且亦今時

其實是一作者美其事而丁寧重言之耳又戰國策段干綸曰臣之求利且不利者非此也注云且猶與也又詩國風終風且噎此且字猶云又也又漢書郊祀志黃帝且戰且學仙鼃錯傳險道傾仄且馳且射李陵傳且戰且引南水經注且田且漕此且字兩務之辭言方且如此又復如彼也又公羊傳隱公元年且如桓立則恐諸大夫之不能相幼君也注云且如假設之辭愚按假得爲且故且亦得爲假也

往 漢書高帝紀見諸將往往耦語往往常也

罔 爾雅云靡罔無也疏云無不有也詩云靡神不  
舉書曰罔有攸赦皆是又書大禹謨罔違道以干  
百姓之譽此罔字禁止之辭猶云無也

儻 疑辭也史記伯夷傳儻所謂天道是邪非邪正  
義云不敢的言是非故云儻也陳書後主紀夫體  
國經野長世字眠雖因革儻殊弛張或異至於旁  
求俊乂爰逮側微用道和羹是隆大厦此儻字猶  
云或也今云儻或重言也又省作黨漢書董仲舒  
傳試迹之古返之于天黨可得見乎師古云黨他  
朗反

黨 荀子天論篇怪星之黨見楊注云黨見頻見也  
又公羊傳文公十三年往黨衛侯會公于杏至得  
與晉侯盟反黨鄭伯會公于斐何休云黨所也所  
猶是齊人語也愚按五百家爲黨黨是居處之所  
故借爲語助之所往所反所猶云往時反時時是  
古通故何云猶是也

枉 徒也空也李義山詩枉緣書札損文鱗

妄 猶云無何無端非意所及故云妄也漢書車千  
秋傳漢置丞相非用賢也妄一男子上書卽得之  
矣金日磾傳陛下妄得一胡兒卽貴重之

併 廣韵云皆也庾子山春賦河陽一縣併是花併  
是花猶云都是花也又漢書賈誼傳高皇帝與諸  
公併起師古云併殺雜也愚按併起者一齊俱起  
故師古云殺雜也

請 以卑承尊有所啓請故云請也論語請問其目  
又云罔雖不敏請事斯語矣

鼎 漢書賈誼傳天子春秋鼎盛應劭云鼎方也賈  
捐之傳顯鼎貴上信用之如淳云言方且欲貴也  
又匡衡傳無說詩匡鼎來服虔云鼎猶言當也若  
言匡且來也應劭云鼎方也張晏云衡少時字鼎

長乃易字稚圭世所傳衡與貢禹書上言衡敬報  
下言匡鼎白知是字也師古云服應二說是

頃 猶云間也俄頃少間也史紀循吏傳市令告相  
曰市亂相曰如此幾何頃乎市令曰三月頃幾何  
頃猶云幾何間也又漢書楊惲傳頃者足下離舊  
土臨安宅世說自頃世故睽離心事淪蕪此頃字  
猶云近來也頃不訓近因少頃俄頃之義省而通  
耳如韓湘詩能開頃刻花竟以頃爲卽辭矣

竝 一作並爾雅云併也廣韵云比也漢書高帝紀  
諸侯竝起蘇武傳少以父任兄弟竝爲郎竝者同

時相比之辭也。又後漢書方術傳見者呼之曰薊先生。小倖竝行應之。注云竝猶且也。

整 凡數無奇零曰整。蜀志諸葛武侯傳亮以建興五年抗表北伐自傾覆至此整二十年。

等 廣韵云齊也。史記陳涉世家等死耳等死猶云同一死也。又廣韵云輩也。漢書文帝紀單于無言章尼等非章尼一人故云等以括之。又廣韵云類也。漢書趙后傳丞知是何等兒也何等猶俗云那樣。又漢書宣許后傳衍曰夫人言何等不可者何等不可猶云無所不可也。又後漢書文苑傳衡更



熟視曰死公云等道注云等道猶今言何物語也  
應璩詩用等稱才學往往見歎譽此等字竝是何  
辭也又元微之詩總被天公雷雨露等頭成長盡  
生涯等頭猶云一般又孟東野詩文魄既飛越宦  
情唯等閒李義山詩莫訝韓憑爲蛺蝶等閒飛上  
別枝花皮襲美詩等閒遇事成歌詠次取衝筵隱  
姓名等閒猶云尋常輕易之辭也

肯 爾雅云可也愚按肯願辭也心誠願之故爲可  
也左傳成公四年楚雖大非吾族也其肯字我乎  
漢書高帝紀燕王韓廣亦不肯徙遼東又杜子美

詩甘從投轄飲肯作置書郵肯猶云不肯省文也  
有 易繫辭聖人有以見天下之賾聖人有以見天  
下之動漢書賈誼傳臣有以知陛下之不能也有  
者對無之辭確知見其如此故云有以也又論語  
唐虞之際正義云舜之爲虞猶禹之爲夏外傳稱  
禹氏曰有夏則如舜氏曰有虞顓頊已來地爲國  
號而舜有天下號曰有虞氏愚按此言撫有天下  
故云有也春秋隱公三年春王二月己巳日有食  
之亦云有者凡日月合朔日乃食然亦有合朔而  
不食者有食有不食故云日有食之也又隱公十

一年正義云十盈則更始以奇從盈數故云有也  
愚按以奇從盈數者十是盈數一是奇零之數十  
有一年猶云十零一年也或云有又也然則十又  
一年亦是以奇從盈之辭也如論語必有寢衣長  
一身有半史記孔子世家於是肅慎貢楛矢石柝  
長尺有咫諸有字其義竝同又詩國風終風且噎  
不日有噎朱傳云有又也言不旋日而又噎也儀  
禮士相見禮主人對曰某子命某見吾子有辱鄭  
注云有又也疏云鄭轉有爲又者以言某子以命  
命某往就彼見吾子又自辱來於義爲便故從又

不從有也荀子性惡篇以人之性固正理平治邪  
則有惡用聖王惡用禮義矣哉楊注云有讀爲又  
又後漢書二王仲長統傳論或推前王之風可行  
於當年有引敎敎之規宜流於長世此有字猶云  
或也詳五卷或字條下又左傳僖公十年不有廢  
也君何以興僖公二十八年不有居者誰守社稷  
不有行者誰扞牧圉文公十二年不有君子其能  
國乎不有猶云若無又僖公二十八年魏犢束胸  
見使者曰以君之靈不有寧也此不有猶云不敢  
又論語不有博奕者乎此不有猶云豈無又易繫

辭无有遠近幽深遂知來物无有猶云不論又大  
學未育上好仁而下不好義者也孟子然而不王  
者未之有也未有者決辭言斷然必無之也又戰  
國策臣願請藥賜死而恩以相葬臣王不失臣之  
罪而無過舉之名王曰有之遂弗殺而善遇之注  
云有之蓋然其過舉之言

否 廣韵云不也書堯典舜曰否德忝帝位否德猶  
云不德無德也左傳僖公二十三年赴以名則亦  
書之不然則否此言不赴以名則不書之也又大  
學其本亂而末治者否矣此否字不然之辭也又

不然之辭有二如孟子曰否此決辭也如漢書成  
帝紀儒林之官四海淵原宜皆明於古今溫故知  
新通達國體故謂之博士否則學者無述焉此否  
字兩設之辭言不如此則學者無所傳述也

偶 增韵云適然也後漢書儒林傳詔問昆曰前在  
江陵反風滅火後守弘農虎北渡河行何德政而  
致是事昆對曰偶然耳太上隱者詩偶來松樹下  
高枕石頭眠凡云偶者非常然故得爲適也

後 然後而後乃後並繼事之辭也又通作后大學  
物格而后知至

苟

論語苟志於仁矣無惡也朱注云苟誠也其心

誠在於仁則必無爲惡之事矣又孟子苟得其養  
無物不長此苟字辭之未定猶云果也審也又中  
庸苟無其德不敢作禮樂焉此苟字猶云如也若  
也又論語苟美矣朱注云苟聊且粗略之意後漢  
書馬援傳李孟平生自言所以擁兵衆者欲以保  
全父母之國而完墳墓也又言苟厚士大夫而已  
此言聊復爲士大夫地無他願望也義與上同又  
詩國風人之爲言苟亦無信舍旃舍旃苟亦無然  
鄭箋云苟且也愚按此云姑且也又揚子法言非

苟知之此言非但知之也苟且也且第也第但也  
轉相訓

某儀禮士冠禮字辭曰禮儀既備今月吉日昭告  
爾字爰字孔嘉髦士攸宜宜之于假永受保之曰  
伯某甫疏云伯某甫者若云尼甫嘉甫也但設經  
不得定言人字故言甫爲且字是以禮記諸侯薨  
復曰臯某甫復鄭云某甫且字以臣不名君且爲  
某之字呼之愚按伯某甫者無所指名之辭凡無  
所指名及泛言事物與不知姓名皆云某也如儀  
禮聘禮反命曰以君命聘於某君某君受幣於某



宮某君再拜以享某君某君再拜漢書項藉傳某  
時某喪使公主某事不能辦元許后傳設妾欲作  
某屏風張於某所柳子厚文永有某氏之類是也  
某甫復者不敢斥君之名也如尚書惟爾王孫某  
禮記孝王某之類是也

陡 與斗通猝然也張九齡勅日本書丹墀真人廣  
成等入朝東歸初出江口雲霧斗暗所向迷方汪  
莘憶秦娥詞夜來陡覺霜風急

變 浸寢滯浸竝同廣韵云漸也易遯卦彖傳小利  
貞浸而長也揚子法言浸以廣大漢書禮樂志質

樸日消恩愛浸薄溝洫志海水溢西南出寤數百里又漢書劉向傳政山王氏出災異浸甚此浸字猶云彌也益也廣陵厲王傳寤信女須等師古云寤古浸字漸也益也

審 信也果也黃庭經審能行之可長存史記張耳傳貫高喜曰吾王審出乎

甚 廣韵云劇過也愚按猶極也史記文帝紀今秘祝之官移過於下以彰吾之不德朕甚不取晏平仲傳意氣揚揚甚自得也漢書高帝紀欲省賦甚又姜夔探春慢詞甚日歸來梅花零亂春夜齊天

樂詞夜涼獨自甚情緒此甚字猶何也又周密一枝春詞東風尚淺甚先有翠嬌紅嫵此甚字猶云如何俗云爲甚也

恁 方言此也姜夔疎影詞等恁時重覓幽香已入小牕橫幅又黃機水龍吟詞恨茶蘼吹盡櫻桃過了便只恁成辜負此恁字猶云如此言便只是如此遂過卻春也

敢 書湯誓敢昭告於皇皇后帝禮記投壺賓曰敢固辭主人曰敢固以請儀禮士虞禮敢用絜牲鄭注云敢冒昧之辭疏云凡言敢者皆是以卑觸尊

不自明之意又書盤庚予敢動用非罰而誥矧曰其敢崇飲此敢字猶云豈敢省文也

漸 廣韵云漸次也稍也漢書成帝紀其中勅有司以漸禁之魏志陳羣傳注太丘長陳實實子瀉臚紀紀子司空羣羣子泰四世於漢魏二朝並有重名而其德漸漸小減

奄 詩大雅奄有四方毛傳云奄大也愚按奄有函蓋之意故云大也又廣韵云忽也遽也世說注愉始至鎮而桓予楊佺期舉兵以應王恭乘流奄至

惜 爾雅云曾也郭注云發語辭見詩邢疏云惜猶

言曾也會則也皆發語辭郭云見詩者小雅節南山  
山懽莫懲嗟衛風河廣曾不崇朝之類是也愚按  
此言節南山之懽莫懲嗟猶河廣之曾不崇朝也  
大雅民勞式遏寇虐懽不畏明雲漢胡寧瘝我以  
旱懽不知其故毛傳竝云懽曾也懽得爲曾者音  
相近也